

Na osnovu člana 50. stav 3. Zakona o građevinskim proizvodima („Službene novine Federacije BiH“, broj 78/09), Federalni ministar prostornog uređenja d o n o s i

**PRAVILNIK
O KONTROLNOM POSTUPKU I NAČINU PROVOĐENJA KONTROLNOG
POSTUPKA ZA GRAĐEVINSKE PROIZVODE**

Član 1.

Ovim Pravilnikom se pobliže propisuje kontrolni postupak i način provođenja kontrolnog postupka kojim se utvrđuje da li građevinski proizvod ima propisana tehnička svojstva, te ispunjava li i druge propisane zahtjeve.

Član 2.

Kontrolni postupak provodi se ispitivanjem uzoraka građevinskog proizvoda ili provedbom drugih potrebnih radnji prema programu koji utvrđuje ovlašteno pravno lice koje provodi taj postupak, a u skladu sa odredbama Zakona o građevinskim proizvodima i propisa donesenih na osnovu istog.

Član 3.

Kontrolni postupak, na traženje nadležnog inspektora iz člana 41. Zakona o građevinskim proizvodima („Službene novine Federacije BiH“, broj 78/09), provodi pravno lice koje je ovlašteno za provođenje radnji ocjenjivanja usklađenosti i/ili izdavanja certifikata o usklađenosti građevinskog proizvoda za kojeg se provodi kontrolni postupak, u skladu sa odredbama Pravilnika o uslovima za lica koja provode radnje ocjenjivanja usklađenosti građevinskih proizvoda („Službene novine Federacije BiH“, broj 49/10).

Član 4.

Kontrolni postupak ne može provoditi niti u njemu može sudjelovati pravno lice koje je u razdoblju od tri godine prije dana utvrđivanja sumnje u svojstva građevinskog proizvoda učestvovalo u postupku ocjenjivanja usklađenosti i/ili izdavanja certifikata o usklađenosti proizvoda u čija se svojstva sumnja.

Član 5.

Danom utvrđivanja sumnje u svojstva građevinskog proizvoda smatra se dan njezinog evidentiranja u službenoj zabilješci, odnosno u zapisniku o nadzoru građevinskog proizvoda u čija svojstva se sumnja, neovisno o datumu zaprimanja eventualne prijave ili drugog načina saznanja o tom proizvodu. Nadležni inspektor je dužan evidentirati sumnju u svojstva građevinskog proizvoda i razloge za nju u roku od 30 dana od dana saznanja (prijava ili drugi način saznanja).

Član 6.

Pravno lice određeno za provođenje kontrolnog postupka mora se prilikom odgovora na zahtjev za provođenje kontrolnog postupka, bez posebnog poziva, pisanom izjavom izjasniti o činjenicama bitnim za primjenu člana 4. ovog Pravilnika. Ova se izjava posebno ne ispituje, osim u slučaju sumnje.

Član 7.

Ako se u kontrolnom postupku utvrdi da građevinski proizvod ne ispunjava propisane zahtjeve, nadležni inspektor će proizvođaču, ovlaštenom zastupniku, uvozniku odnosno distributeru građevinskog proizvoda rješenjem narediti zabranu stavljanja na tržište i distribuciju građevinskog proizvoda, te istim rješenjem zabraniti ugradnju tog građevinskog proizvoda svim potencijalnim izvođačima.

Rješenje iz stava 1. ovog člana, koje donese federalni urbanističko-ekološki inspektor, osim stranci, dostavlja se i federalnom tržišnom inspektoru i Federalnom ministarstvu prostornog uređenja (u daljnjem tekstu: Ministarstvu).

Rješenje iz stava 1. ovog člana, koje donese federalni tržišni inspektor, osim stranci, dostavlja se i federalnom urbanističko-ekološkom inspektoru i Ministarstvu.

Rješenje iz stava 1. ovog člana, koje donese kantonalni građevinski inspektor, osim stranci, dostavlja se i Federalnoj upravi za inspekcijske poslove i Ministarstvu.

Član 8.

Ovaj Pravilnik stupa na snagu narednog dana od dana objave u "Službenim novinama Federacije BiH".

Broj 01-02-3-573/11
5. maja 2011. godine
Sarajevo

Ministar
Mr. sc. Desnica Radivojević, s. r.